

Rier a Zernez

Gronda festa dal Club da hockey da Zernez

DA MARTINA FONTANA / ANR

In sonda organischa il Club da hockey da Zernez üna sairada da rier. Gieri Scharfaug ed ün duo da comikers appenzellais trategnan il public e pisseraran per risadas. Quist eveniment dess esser il prim d'üna seria. Chi dà insomma üna sairada da tratenimaint cun bal as poja ingrazchar al giubileum da 40 ons existenza dal Club da hockey da Zernez. Quel es gnü festagü avant trais ons. In quell'ocasiun ha üna gruppa da teater da Zernez giovà ün toc in trais acts scrit da Jacques Guidon bel ed aposta in ocasiun da l'anniversari dal club. Sper otras preschantaziuns umuristics ha in seguit gnü lö ün bal. «Nus vain gnü grond success cun quella sairada e la glieud in cumün ans ha giavüschà dad organiser da quella sairadas eir in avegnir», disch Jörg Rodigari da Zernez, il president dal Club da hockey da Zernez. Quai es lura eir capità: dürant ils ultims trais ons sun gnüdas organisadas sairadas sumgliaintas. «Ed eir quellas han gnü success ed han fat plaschair», declera'l. Cha perquai s'haja eir quist on organisà alch special. «Nus vain pudü ingaschar il comiker grischun, Gieri Scharfaug, ed a duos comikers appenzellais chi trategnan il public in lur möd unic», manaja'l.

Dependents dal success

Cha dad organiser üna tala sairada saja üna sfida, manajan ils organisatuors da la sairada. Ils comikers ingaschats pre-

tendan üna ter gascha ed eir la musica da bal nu suna gratuitamaing. «Grazcha a sponsuors gronds pudaina surtout la respunsabiltà ed eir il ris-ch finzial per organiser la sairada», disch Rodigari. Cha da far guadogn e na perdita saja evidaintamaing il böt da la l'eveniment. «Nus dovrain quels raps per promouvoir nos club, pajar lizenzas, arbiter, chomps da trenamaint, pajar il fit da la piazza da glatsch e per pudair cumprar material e manduras», declera'l. Tant el sco eir il respunsabel dals seniors dal Club da hockey da Zernez, Domenic Toutsch, han però buna spranza ch'eir quista sairada dvainta ün success. «Nus sperain cha blera glieud vegna a giodair cun nus la sairada speciala», disch Toutsch. Cha fin uossa s'haja survgni il sustegn gaivüschà e cha quai nu sarà neir quist on oter.

Rier cun cuntinuaziun

Fingü avant cha la sairada da rier a Zernez es passada es üna chosa evidainta pels organisatuors da quella. Ella dess avair cuntinuaziun e gnir organisada eir i'ls prossems ons. «Nus vulain spordscher alch a nossa populaziun», argumentescha Jörg Rodigari. Cha a la fin dals quintes saja la populaziun quella chi sustegna – in differentas manieras – lur club. «La vita exista da dar e tour», es sia argumentaziun.

La sairada «rier a Zernez» ha lö in sonda, ils 26 favrer, a partir da las 20.30. L'arrandschamaint ha lö illa sala da gimnastica da la chasa da scuola da Zernez.



Grazcha al success dal giubileum da 40 ons Club da hockey da Zernez vain eir quist on organisada üna sairada da trategnimaint tuot speciala.



Il comiker grischun, Gieri Scharfaug, pisserà in sonda a Zernez per risadas.



Eir il duo da comica appenzellais «Messer und Gabel» as preschantan a Zernez. FOTOS MAD

Il «verm» nu daja plü

I'l cumün da Susch daja darcheu vita

DA MARTINA FONTANA / ANR

Avant pacs ons d'eira gnü dit cha a Susch saja «aint il verm». Affars serrats, pacs giasts e paca vita in cumün vaivan dat andit da far ponderaziuns d'amegldramaint. Grazcha a la Clinica Holistica ed a l'ingaschamaint da la populaziun sun quels temps uossa passats; il cumün viva darcheu. «Cun la realisaziun e l'avertüra da la Clinica Holistica ha nos cumün survgni vita», disch il president cumünal da Susch, Emil Müller. Chi sajan gnüdas schaffidas plazzas da lavur e cha fingü quai saja da grond avantag. Chi's vezza adüna darcheu giasts sün via e chi's bada cha la nouva spüerta a Susch vegna tratta a nüz, manaja el. «I's bada intant amo cha la clinica nun es plaina», disch el e manaja cha quai as müdarà però bain amo. Bel saja eir cha l'ustaria, uossa integrada illa Clinica, es darcheu averta. «Pel cumün cha-

schuna la Clinica cun seis impiegats chi vivan quia eir entradas d'imposta», intu-na'l ün ulteriur avantag.

In tuot il cumün reacziuns positivas

La mansteranza da Susch e da la regiun han pudü profitar da la Clinica Holistica fingü cur cha quella es gnüda fabrichada. Ma eir uossa survegnan els da tuotta sorts incumbenzas chi tils fan plaschair. Ma eir oters affars profitan da la spüerta da la nouva clinica. «Ils giasts da la clinica vegnan adüna darcheu in butia», disch Erika Müller chi maina insemel cun seis hom Andrea la butia «Treffpunkt» a Susch. Cha quai fetscha plaschair e saja per els fich positiv. «Daspö cha la clinica ha avert sias portas es nouva butia averta eir la dumengia», disch ella. Ch'intant funcziuna quai bain, chi's stopcha però amo avair pazienza per pudair far ün bilantsch definitiv. Eir il possessur da l'Ho-

tel Flüela a Susch, Andri Margadam, vezza ill' avertüra da la Clinica Holistica a Susch be avantags: «Nus vain daplü giasts e pudain tuots insemel profitar da quels. Nus pudain furnir fluors e decoraziuns e vendain adüna darcheu fluors pels giasts da la clinica», disch Steivan Müller da la Giardinaria Müller a Susch. Ch'el saja cuntaint cha la Clinica Holistica as rechatta in cumün: «Per nos affar es quai be d'avantag.» Perfin la gascha in cumün bada l'existenza da la Clinica Holistica. «Minchatant vaina da far alch reparaturetta, vain eir pudü vender autos e regularmaing carburant», disch Duri Nodè, il possessur da la gascha. Ma eir per el es il plü positiv da l'avertüra da la Clinica Holistica, chi dà darcheu dat vita in cumün. Cha a la fin dals quintes possan tuots be profitar da la nouva spüerta e s'allegrar chi dà insoma üna da quella in ün cumün pitschen sco Susch, es sia conclusiun.



La populaziun da Susch es cuntainta cha la Clinica Holistica as rechatta in cumün. FOTO: A. ZINI



La Quotidiana presenta l'annada 2010

Suenter la quarta ediziun dils pops digl onn 2009 selegra La Quotidiana da presentar el decuors dil meins avrel 2011 ils affons naschi igl 1. quartal 2010. Nus dein la pussevvladad agl entir intschesch romontsch da separticipar.

Tarmettei pia ina foto actuala da vies affon ch'ei naschius denter il schaner e la fin mars 2010 cun las suandontas indicaziuns:

- num e prenum digl affon
- data da naschientscha
- liug da domicil
- num e prenum dils geniturs

La foto digitala duei esser sil pli pauc 500 KB. Fotografias da handy ein buc adattadas, fotos sin pupi perencunter bein. Secapescha che lezzas vegnan returnadas.

L'emprema ediziun cumpara igl avrel 2011. Ella cumpeggia affons ch'ei naschi igl emprum quartal 2010 (schaner–mars 2010). Las fotografias e las indicaziuns ein dad inoltrar entochen ils

4 d'avrel 2011 alla suandonta adressa:

La Quotidiana
L'annada 2010
Via comerciala 22
7007 Cuera

e-mail: redaktion-lq@suedostschweiz.ch

Ord il ravugl dallas annunzias inoltradas trai la diala da cletg mintga quartal treis victurs.

La Quotidiana selegra dils purtrets dils affons romontschs ed engrazia per la collaboraziun.